



## Bereket - značenje, blagodati i uzroci gubitka (Medina)

Hatib: dr. Husejn ibn Abdulaziz Alu Šejh

23. džumadel-uhra 1445. po Hidžri / 5. januar 2024.

Hvala Allahu na ovom i budućem svijetu. Svjedočim da nema boga osim Allaha, Jedinog, Koji nema sudruga, i svjedočim da je naš vjerovjesnik Muhammed, sallallahu alejhi ve sellem, Njegov rob i poslanik, neka su Allahova milost, spas i blagoslov na njega, na njegovu porodicu i ashabe.

O muslimani, najbolja oporuka je bogobojaznost, činjenje dobra ljudima i iskazivanje pokornosti Gospodaru.

U ovom vremenu životnih briga, pritisaka, zahtjeva i izazova, mnogi ljudi žale se na uskraćivanje bereketa, blagoslova. Bereket je jedna od nužnih pretpostavki u ovomsvjetskim užicima, kako bi se umnožili, uvećali i pokazali njihovi pozitivni plodovi.

Stoga, kada god se iz nečega ukloni blagoslov, izostanu njegovi zreli plodovi i najljepše koristi, štaviše, tamo gdje nema bereketa, spušta se nevolja i bijeda. Vjerovjesnik, sallallahu alejhi ve sellem, rekao je: "Nije suša kad vam ne pada kiša, nego je suša kada kiša pada i pada, ali ništa ne niče iz zemlje." (Muslim)

Čovjek kojeg je Allah prosvijetlio uputom traži uzroke za spuštanje i dolazak bereketa u svoj život i nastoji ih postići, kako bi postigao koristi ovog života, kako bi se uvećale njegove dobrobiti i kako bi živio lijep i ugodan život.

Blagoslov u onome što je dato čovjeku otklanja opasnosti od psihičkih smetnji i očekivanih strahova, što rezultira smirenjem i utjehom duše, i zadovoljstvom i srećom srca.

Najveći uzrok postizanja blagoslova, blagostanja i sreće jeste ustrajnost u pokornosti Allahu, džellešanu, izvršavanje propisa Njegovog šerijata i neprelaženje granica





koje je On postavio. Uzvišeni kaže: "A da su stanovnici sélā i gradova vjerovali i grijeha se klonili, Mi bismo im blagoslove i s neba i iz zemlje slali." (El-A'raf, 96)

S druge strane, najveći uzrok uskraćivanja bereketa jeste raširenost zabranjenih stvari i ustrajavanje u grijesima i lošim stvarima: "Zbog onoga što ljudi rade, pojavio se metež i na kopnu i na moru, da im On dā da iskuse kaznu zbog onoga što rade, ne bi li se popravili." (Er-Rum, 41)

O muslimani, jedna od očiglednih posljedica gubitka bereketa jesu veliki ekonomski problemi i veliki finansijski izazovi s kojima se svijet danas suočava, uz dostupnost ogromnih mogućnosti i basnoslovnih količina novca. Pored svega toga, svijet se suočava s opasnom inflacijom, ekstremno visokim cijenama, gomilanjem ogromnih dugova, a sve zbog udaljenosti velikog broja ljudi od božanskog programa, koji je njihov Stvoritelj odabrao za njih, i učinio ga jedinim putem do njihove sreće u životu na ovom i budućem svijetu.

Među tim devijacijama je i širenje poslova utemeljenih na kamati, na kojima je danas izgrađena svjetska ekonomija, zbog kojih su čovječanstvo zadesile ekonomske katastrofe i mnogobrojni društveni problemi. "Allah uništava kamatu, a unapređuje milosrđa." (El-Bekara, 276)

O vjernici! U današnjem svijetu povećale su se i diverzificirale komercijalne prevare, s beskonačnim varijacijama i oblicima, što je bio uzrok raznih finansijskih izazova i rizika, i što je u konačnici dovelo do recesije i devastacije u trgovačkom prometu, te gubitka blagoslova – bereketa. Poslanik, sallallahu alejhi ve sellem, rekao je: "Kupac i prodavac imaju pravo izbora, odnosno opoziva, sve dok ne napuste mjesto sklapanja ugovora. Ako budu iskreni i otkriju nedostatak, njihova trgovina bit će blagoslovljena, a ako sakriju nedostatke i budu se koristili lažima, u njihovoj trgovini neće biti blagoslova." (Muslim)

Braćo u islamu, jedan od razloga za gubitak blagoslova u imetku jeste sve masovnija upotreba lažne zakletve u svrhu reklamiranja robe, a u modernom poslovanju tome bi se moglo pridružiti sve što je u ovom smislu lažne zakletve, kao što su komercijalne





reklame koje sadrže krivotvorenje svojstava i obmanjivanje ljudi, što je postala raširena praksa na društvenim mrežama. Poslanik, sallallahu alejhi ve sellem, rekao je: "Zaklinjanje doprinosi prodaji robe, ali uništava bereket u zaradi." (Muttefekun alejhi)

Jedan od uzroka uskraćivanja blagoslova, na individualnoj i kolektivnoj razini, jeste kontrola javnih fondova, kroz pljačku, otimačinu, manipulaciju i pronevjeru. Posljedice ovoga pogubne su kako za onoga koji to čini, tako i za društvo u cjelini, zbog čega je Poslanik, sallallahu alejhi ve sellem, rekao: "Ovaj imetak je lijep i privlačan, ko ga uzme čiste duše, bit će mu blagoslovljen, a ko ga uzme s pohlepom, neće imati blagoslova u njemu, i bit će poput onoga koji jede, a ne može se zasititi." (Muttefekun alejhi) Ako se ovaj hadis odnosi na nekoga ko pohlepno i s velikom željom uzima javni novac (ne nužno na zabranjen način), šta je tek s onim ko ga uzima na zabranjen način?

Jedan od razloga izostanka blagoslova jeste pojava ekonomskih katastrofa u društvu, i poigravanje s ljudskim novcem na mnoge načine, uključujući neplaćanje kupljene robe, nevraćanje kredita, neplaćanje stanarine i sl. Poslanik, sallallahu alejhi ve sellem, rekao je: "Ko uzme ljudima novac s namjerom da ga vrati, Allah će mu pomoći da ga vrati, a ko ga uzme s namjerom da ga upropasti, Allah će njega upropastiti." (Buhari)

Zato se bojte Allaha, pridržavajte se božanskog programa i Poslanikove, sallallahu alejhi ve sellem, upute u svim svojim poslovima i životnim situacijama. Ako tako budete radili, na vas će se spustiti blagoslov, dobra djela će prevladati, a zreli i korisni plodovi ovog svijeta će vam doći.

O muslimani, ako islamski ummet zaista želi da mu se povećaju Božiji blagoslovi i njegove blagodati, onda se svi moramo iskreno i usrdno pokajati i popraviti ono što nije ispravno u našim životima, po principima islama, propisima Kur'ana i sunnetu Adnanova potomka Muhammeda, sallallahu alejhi ve sellem.





“... i govorio: ”Tražite od Gospodara svoga oprost jer On, doista, mnogo prašta; On će vam kišu obilnu slati i pomoći će vas imanjinima i sinovima, i dat će vam bašče, i rijeke će vam dati.” (Nuh, 10–12)

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!” (El-Ahzab, 56)

O vjernici, jedan od razloga spuštanja blagoslova jeste ustrajno donošenje salavata na časnog Poslanika, sallallahu alejhi ve sellem.

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

Gospodaru naš, smiluj se i podari mir i blagoslov Poslaniku i njegovoj porodici i svim njegovim ashabima i onima koji ih slijede u dobru do Sudnjega dana.

Gospodaru naš, budi zadovoljan svim Poslanikovim ashabima i njegovom porodicom, o Živi i Vječni!

